

Pablo Tesalónicacjārārē ojamũ'tāca pūrĩ ni'i

A'ti pūrĩ a'tiro weero ojano'pã nise ni'i

Pablo Tesalónica, Macedonia di'tapũ nirĩ macācjārārē ojacũ niwĩ. A'ti pūrĩrē ojacũ, Corintopũ nicũ niwĩ. Todũporopũre cũ basuta narē Jesucristo yere were, cūrē ějõpeori curuacjārã sājācã weecũ niwĩ. Cũ ějõpeocã wéeca be'ro Timoteo añuse quetiti ejacã tũ'ogũ, maata narē a'ti pūrĩrē ojacũ niwĩ. Na añurõ weesere tũ'ogũ, Õ'acūrē e'catise o'ocũ niwĩ. Tojo nicã Jesucristo ějõpeosere weenemocã uasāgũ ojacũ niwĩ. Na cūrē sērĩtiña'quere yũ'tigũ ojacũ niwĩ. Cũ Jesucristo apaturi a'tiatjere ojacũ niwĩ.

Pablo cũ me'rācjārã me'rã Tesalónicacjārã Jesucristo ějõpeorārē oja'que ni'i

¹ Yũ'u Pablo, yũ'u me'rācjārã Silvano, Timoteo me'rã mūsārē a'ti pūrĩrē oja'a. Mūsã Tesalónicacjārārē marĩ pacũ Õ'acũ, marĩ wiogũ Jesucristo yarārē añudutise o'o'o. Õ'acũ mūsārē añurõ weeato. Mūsārē ejerisājācã weeato.

Pablo Tesalónicacjārã na añurõ weesetisere tũ'ogũ Õ'acūrē sērĩbosa'que ni'i

² Mūsārē ũsã ñubuesetirinucũ marĩ pacũ Õ'acūrē e'catise o'onu'cũcã'a. ³ Cūrē ñubuerã, a'tiro ni'i. “Õ'acũ, Tesalónicacjārã mũ'u

macũ Jesucristore ějõpeorã añurõ weeseti-sama. Na ma'isere ĩ'orã, ãpẽrãrẽ añurõ weeta-musama. Jesucristo cũ apaturi a'tiatjere e'catise me'rã yucuerã weesama. Tojo weerã cũrẽ ějõpeodu'utisama", ni ñubue'e Õ'acũrẽ.

⁴ Õ'acũ musãrẽ ma'imi. Cũ, yarã niato nígu besecu niwĩ. Æsã a'tere masĩ'i. ⁵ Musãrẽ Jesú ye quetire wererã, ùsã ye Ɂseri me'rã dia'cũ weretiwɁ. Espíritu Santu tutuase me'rã werewɁ. Æsã bu'ese diacjũta ni'i nírã, musãrẽ bu'ewɁ.

Musã masĩsa'a. Æsã topɁ nírã, musãrẽ ma'írã, añurõ weesetiwɁ. ⁶ Musã ùsã wee'quere ĩ'acũurã, ùsã weronojõta weeseticãrã niwũ. Tere wéerã, Jesucristo weeseti'caronojõta weecãrã niwũ. Musãrẽ Espíritu Santu e'catise o'ocã, ɁpɁtu pi'etimirã, Jesucristo ye quetire ñe'ewũ. ⁷ Tojo weerã musã Jesure ějõpeosere ĩ'orã, añuse queose nipe'tirã ãpẽrã Jesure ějõpeorãrẽ o'ocãrã niwũ. Musã ya di'ta Macedoniãcãrãrẽ, tojo nicã ãpẽrã a'ti di'ta Acayãcãrãrẽ tojo weecãrã niwũ. ⁸ Musã me'rãta marĩ wioɁ Jesú ye queti nipe'tiropɁ se'sa wa'a'a. Macedonia, Acaya dia'cũ mejẽtare se'saro weewe'e. Nipe'tiropãrã musã Õ'acũrẽ ějõpeosere masĩpe'titojama. Tojo weerã tere ãpẽrãrẽ werewe'e. ⁹ Mejõ na pe'eta musã weesetisere quetiwerema. Æsã musã tiropɁ nicã, musã ùsãrẽ añurõ wee'quere werema. Apeyema, musã queose yee'cãrãrẽ ějõpeodu'u'quere werema. Tere du'u, ni'cãrõacãrẽ Õ'acũ catigɁ diacjũ nígu pe'ere ějõpeo, cũ Ɂaro weeaporo. ¹⁰ Õ'acũ cũ

macũ Jesú u'musepu nigũrẽ, cũ apaturi a'tiatjere e'catise me'rã yucuerã weeporo. A'tere ãpẽrã ãsãrẽ quetiwerema musã weesetisere. Ô'acũ cũ macũ wẽrĩ'cũpũre masõcũ niwĩ. Cũ Jesúta nimi marĩ urũtu bu'iri bocabo'quere yu'rũo'cũ.

2

Pablo Tesalónicapũ cũ bu'e'quere quetiwere'que ni'i

¹ Acawererã, musã a'tere añurõ masĩsa'a. Æsã Tesalónicapũ sjarã, mejõ warota bu'ecusiaticãrã niwũ. Æsã bu'esere tũ'orã, musã pãjãrã Jesure ãjõpeowũ. ² Æsã musã tiropũ wa'ase duporo ãsã Filipopũ niwũ. Topũ nicã, tocjãrã ãsãrẽ tãrã, ña'arõ bujicã'wã. Musã tere masĩsa'a. Musã ya macãcjãrã quẽ'rã ãsã weresere cã'mota'asĩ'rĩmiwã. Na tojo weemicã, Ô'acũ ãsãrẽ añurõ wãcũtutuase o'owĩ. Tojo weerã cũ ye quetire uiro marĩõ werewũ. ³ Musãrẽ Jesú ye quetire wererã, mejẽcã pe'e weretiwũ. Ña'arõ weesĩ'rĩrã, numiarẽ a'metãrã'sĩ'rĩrã, weeta'sase me'rã weretiwũ. ⁴ Ô'acũ pe'e ã'abesetojagupũ cũ ye queti weresere cũugũtigũ ãsãrẽ besecũ niwĩ. Masã ãsã me'rã e'catiato nĩrã mejẽta cũ ye quetire werewũ. Ô'acũ pe'ere e'catidutirã werewũ. Ô'acũ nimi nipe'tise marĩ wãcũsere masĩgũ. ⁵ Æsã topũ nĩrã, ne ni'cãti musã yere uraripejarã, añurõ ucũta'sa weretiwũ. Musã a'tere masĩsa'a. Ô'acũ quẽ'rã diacjũta ãsã wãcũsere masĩsami.

⁶⁻⁷ Æsã Jesú o'ó'cãrã ni'i. Tojo weerã “Æsãrẽ wiorã weronojõ ã'aña”, nĩmasĩbopã. Tojo nita

basiomicã, ne ni'cūrē nitiwũ. A'tiro pe'e weewũ. Ni'cõ numio co macūrē co'te mi'o masõsamo. Co weronojõ ũsã quē'rã musã tiropũ nírã, musārē ma'írã, tojota weewũ. ⁸ Musārē ma'írã, Õ'acũ ye queti dia'cūrē weretiwũ. Nipe'tise ũsã põtēorõ weetamuta basiosere weetamuwũ. Musārē Ɂpũtũ ma'icãti.

⁹ ũsã topũ nírã da'ra'quere musã wãcũsa'a. Musārē Õ'acũ ye quetire wererã, peje caribose o'osĩ'ritiwũ. Tojo weerã ũsārē a'mácaticã'to nírã ũsã basu da'rawũ. Ñamirĩ, ɁmɁcori yóacãta ũsã ba'atjere, ũsārē dũ'sasenojõrē wapata'arã da'rawũ.

¹⁰ ũsã weeseti'quere musã ĩ'awũ. Õ'acũ quē'rã masĩsami. Musã Jesucristore ějõpeorã me'rã nírã, ũsã weesooro marĩrõ nisetiwũ. Mejẽcã weetiwũ. Õ'acũ Ɂaronojõ nisetiwũ. Tojo weerã ãpẽrã ũsārē “Na bu'iri Ɂuoma” nirõ marĩrõ nicã'wũ. ¹¹⁻¹² Ni'cũ cũ põ'rãrē weronojõta ũsã quē'rã musãɁcūrē werewũ. E'catise, wãcũtutusere musārē o'owũ. Õ'acũ põ'rã weronojõta nisetidutiwũ. Musārē Õ'acũ cũ põ'rã niato nígũ besesami. Tojo nicã musārē cũ me'rã cũ asistese nirõpũ ninu'cũdutisami.

¹³ Apeye musã ye cjasere weregutĩ. Õ'acũ ye quetire werecã, musã “Õ'acũ ye ucũse ni'i” nírã, maata ějõpeowũ. “Masã na ucũsere ějõpeobosau”, nitiwũ. Musã tojo weesere wãcũrã, Õ'acūrē e'catise o'onu'cũcã'a. ũsã musārē were'que Õ'acũ ucũse warota niwũ. Te queti me'rãta Õ'acũ cũ Ɂaro weeato nígũ musārē

siape me'rã ducayunu'cũgũ weemi.

¹⁴ Mũsã Jesucristore ějõpeocã, mũsã ya di'tacjãrã mũsãrẽ pi'etise o'ocãrã niwã. Judea di'tapũ quẽ'rãrẽ na acawererã judío masã mũsãrẽ wa'a'caronojõta Jesure ějõpeorãrẽ weecãrã niwã. ¹⁵ Judío masãta duporocjãrãpũ quẽ'rãrẽ Ő'acũ ye queti weremũ'tãrĩ masãrẽ wẽjẽcãrã niwã. Marĩ wiogũ Jesure tojota weecãrã niwã. Ősã quẽ'rãrẽ mũsã ya macãpũ nicã, ũsãrẽ ũatirã, cõ'acã'wã. Tojo weegũ Ő'acũ na me'rã tũ'satisami. Judío masã nipe'tirã Jesure ějõpeorã me'rã cumuca dia'cũ ũacã'ma. ¹⁶ Judío masã nitirãrẽ Ő'acũ yũ'rũocã ũatima. Tojo weerã narẽ Jesú ye quetire werecã ũasãtirã, a'tiro weewã. Ősã narẽ weresere cã'mota'asĩ'rĩmiwã. Na ña'arõ weese siape me'rã nemorõ wee'e. Tojo weerã na pajibutiaro bu'iri cũoma. Na yũ'rũnũ'cãpose bu'iri ni'cãrõacãpũta na Ő'acũ bu'iri da'resere bocarãsama.

Pablo quẽ'rã Tesalõnicacjãrãrẽ ĩ'arã wa'asĩ'rĩmi'que ni'i

¹⁷ Ősã mũsã tiropũre wijawã'cãtica be'roacã maata mũsãrẽ ĩ'asĩ'rĩmicãti. Ősã upũ topũ nitimicã, mũsã tiropũ dia'cũ ejeripõ'rãtiwũ. Topũre upũtũ wa'asĩ'rĩmiwũ tja. ¹⁸ Pejetiri yũ'u Pablo basu pe'eta "Wa'agũti", nimiwũ. Ősã topũ wa'asĩ'rĩsetirinũcũ wãtĩ ũsãrẽ cã'mota'amũjãwĩ. ¹⁹⁻²⁰ Mũsãta ni'i ũsãrẽ e'catise o'orã. Tojo weerã mũsãrẽ pũrõ ĩ'asĩ'rĩsa'a. Marĩ wiogũ Jesú cũ apaturi a'ti turipũ a'ticã, cũrẽ wererãti mũsã ye quetire. A'tiro nirãti: "Ă'rãta nima ũsãrẽ e'catise o'o'cãrã. Narẽ mejõ waro mũ'u ye

quetire weretiwx. Na tere tu'orã, mu'urẽ añurõ
 ëjõpeowã. Tojo weerã pũrõ e'cati'i na me'rã",
 nirãti cũrẽ.

3

1-2 Mũsã ye quetire tu'osĩ'rĩrã, põtẽoticãti.
 Tojo weerã mũsã tiropu Timoteore ï'adutirã
 o'ówu. "Ësã pe'e Atenapu tojarãti", niwũ.
 Timoteo ãsã me'rãcjũ Jesú ye quetire werecu-
 siatamugũ nimi. Cũ mũsãrẽ Jesure nemorõ
 ëjõpeocã weegusami nĩrã, o'ówu. Tojo nicã
 wãcũtutuanemosere wereato nĩrã cũrẽ o'ówu.
 3-4 Æpẽrã masã mũsã Jesure ëjõpeocã ï'arã,
 ï'atu'ti, bujicã'sama. Na tojo weecã, Jesure
 ëjõpeodu'uticã'to nĩrã Timoteore weredutirã
 o'ówu. Ësã topu nĩrã, mũsãrẽ a'tere wereyu-
 tojawu. "Marĩ Jesure ëjõpeorã, pi'etino'rõsa'a",
 niwũ. Ësã ní'caronojõta marĩ nipe'tirãrẽ queoro
 wa'aro wee'e. Mũsã tere masĩsa'a. 5 Mũsã Jesure
 ëjõpeosere masĩsĩ'rĩgũ põtẽoti, ¿de'ro wa'amiti
 narẽ? nígũ, mũsã ye quetire miitidutigũ Timote-
 ore o'ówu. "Apetero weegu mũsãrẽ wãtĩ Jesure
 ëjõpeodu'ucã weecã'pĩ", nicãti. ¿Ësã bu'e'que
 ne wapamarĩpari? ni masĩsĩ'rĩgũ cũrẽ o'ówu.

*Tesalónicacjãrã ye quetire Timoteo quetiti
 eja'que ni'i*

6 Ni'cãrõacãrẽ Timoteo mũsã tiropu
 ní'cu dajatojami a'topure. Cũ mũsã yere
 añuse quetiti dajami. A'tiro niami: "Na
 Jesure ëjõpeonu'cũcã'ma. Na basu añurõ
 a'merĩ ma'isetiama. Marĩrẽ ma'ise me'rã
 wãcũnu'cũcã'ma. Marĩrẽ pũrõ ï'asĩ'rĩama marĩ

narē ĩ'asĩ'rĩrõnojõta", ni quetiti dajami. ⁷ Mũsã Jesure ějõpeose quetire tũ'orã ũsã pi'etimirã, e'cati'i. ⁸ Marĩ wioḡũ Jesure ějõpeonu'cũcã tũ'orã, yujupũta ũsã ejerisãjãse cũ'o. ⁹ Tojo weerã mũsãrẽ wãcũrã, e'catiyũ'rũasa'a. Õ'acũrẽ mũsã ye cjasere ũsã ȷde'ro wee e'catise o'opõtẽobosau? Basiowe'e. ¹⁰ Ñamirĩ, mũũcorita yóacã Õ'acũrẽ sẽrĩnu'cũcã'a mũsã tiropũ wa'asĩ'rĩrã. Mũsãrẽ Jesú yere wereyapada'reosĩ'rĩsa'a.

¹¹ Ësã marĩ pacũ Õ'acũrẽ, marĩ wioḡũ Jesure a'tiro sẽrĩ'i. "Tesalónicacjãrã tiropũ ũsãrẽ o'óya. ¹² Nemorõ na basu a'merĩ ma'iseticã weeya. Nipe'tirã ãpẽrã quẽ'rãrẽ ma'icã weeya. Narẽ ũsã ma'irõnojõta na quẽ'rã ãpẽrãrẽ ma'iato. ¹³ Õ'acũ, mũ'ũrẽ ějõpeodu'uticã'to. Mũ'ũ ũaro weeato. Narẽ wãcũtutuacã weeya. Mũ'ũ narẽ tojo weecã, mũ'ũ ĩ'orõpũ bu'iri marĩrã nirãsama. Tojo weerã Jesú apaturi a'ti turipũre cũ yarã me'rã a'ticã, bu'iri marĩrã nirãsama." A'tiro ni sẽrĩbosa'a mũsã ye cjasere marĩ pacũ Õ'acũrẽ.

4

Pablo Jesure ějõpeorãrẽ Õ'acũ tũ'saronojõ weeduti'que ni'i

¹ Apeye mũsã ye cjasere werenemosĩ'rĩsa'a. Yũ'ũ basu dutise mejẽta ni'i. Marĩ wioḡũ Jesú dutisere were'e. Ësã mũsãrẽ duti'caronojõta Õ'acũ tũ'sasenojõrẽ weeya. Mũsã ni'cãrõacãrẽ Õ'acũ duti'quere weerã wee'e. Siape me'rã

nemorõ weenemoña. ² Æsã were'quere musã masĩsa'a. A'tere wererã, Jesú marĩ wiogu cũ dutiro me'rã musãrẽ werewu.

³ Õ'acũ cũ haro weecã tu'sasami. Cũ yarã weronojõ weesetiya. Musã numosãnumia, musã marãpusumua nitirãrẽ a'metãrãticã'ña. ⁴ Musãncũ wiopesase me'rã ña'arõ weel'orõ marĩrõ omocã du'te, numotiburoya. Musã tojo weecã ï'arã, ãpẽrã "Añurõ weema", nirãsama. ⁵ Õ'acũrẽ masĩtirã numiarẽ ña'arõ weesĩ'rĩrã, haripejasama. Musã na weronojõ niticã'ña. Mejõ wãcũtutuaya. ⁶ Ne apĩ numorẽ a'metãrãticã'ña. Musã apĩ numorẽ a'metãrãrã, co marãpure ña'arõ weerã weesa'a. Õ'acũ a'te ña'ase weerãrẽ bu'iri da'regusami. Toduporopu musãrẽ weretojawu a'te nucũ'ase quetire. ⁷ Õ'acũ marĩrẽ ña'asere weedutiticu niwĩ. Añuse pe'ere cũrẽ ejõpeorã weesetironojõ weeduticu niwĩ. ⁸ No'o a'te bu'esere teerãnojõ ãsãrẽ teerã mejẽta weesama. Õ'acũ pe'ere teerã weesama. Õ'acũ marĩrẽ cũ haro weedutigu Espĩritu Santure o'ócũ niwĩ. Tojo weerã cũ haro weetirã, "Õ'acũ, mu'urẽ hawe'e", nirã weesama.

⁹ Musã a'merĩ ma'isetise pũrĩcãrẽ werewe'e. Õ'acũ cũ basu pe'e Espĩritu Santu me'rã musãrẽ a'merĩ ma'idutitocũ niwĩ. ¹⁰ Musã ya di'ta Macedoniacjãrãrẽ nipe'tirã Jesure ejõpeorãrẽ ma'isetirã, cũ duti'caronojõ weerã wee'e. A'te pe'ema musãrẽ wereguti. Jesure ejõpeorãrẽ nemorõ ma'inemoña. ¹¹ Añurõ cumuca marĩrõ nisetiya. Æpẽrãrẽ queti pooticã'ña. Musã ye nitisere, ãpẽrã ye cjasere ucja wãcũnurãticã'ña.

Musã ye pe'ere wãcũña. Musã da'rase cãosere añurõ da'rasetiya. Nijĩsijaticã'ña. Toduporopure musã tiropu nĩrã, a'tere were-tojawu. ¹² Musã tojo añurõ da'rarã, ãpẽrã a'mãcano'ña marĩrãsa'a. Musã basu da'rase me'rã catirãsa'a. Musã tojo weecã ĩ'arã, Jesure ãjõpeotirã musãrẽ añurõ wiopesase me'rã wãcũrãsama.

Jesú apaturi a'ti turipu a'tiatje queti ni'i

¹³ Apeye tja weregati. Wẽrĩ'cãrãpu de'ro wa'arãsari nisere musãrẽ were-casanu'cõsĩ'rĩsa'a. A'tere masĩrã, Jesure ãjõpeorã na wẽrĩcã, pũrõ bujawetisome. A'tiro ni'i. Jesure ãjõpeorã wẽrĩrã, cũ tiropu cũ me'rã ninu'cũcã'rãsama. Cũrẽ ãjõpeotirã pũrĩcã cũ tiropu ne wa'asome. Tojo weerã Jesure ãjõpeotitĩjarã, na me'rãcjãrã, na acawererã wẽrĩcã, pũrõ bujawetisama. Musã pũrĩcã Jesure ãjõpeo'o. Tojo weerã na weronojõ bujaweticã'ña. ¹⁴ Marĩ a'tere ãjõpeo'o. Jesú wẽrĩ'cupu masãcu niwĩ. Cũ apaturi a'ti turipu a'ticã, cũrẽ ãjõpeorã wẽrĩ'cãrãrẽ Õ'acũ cũ macũrẽ masõ'caronojõta masõgũsami. Masõtoja, cũ tiropu miagũsami.

¹⁵ Ni'cãrõacãrẽ marĩ wiogu Jesú were'quere musãrẽ wereturiarã wee'e. Jesú a'ti turipu apaturi a'ticã, Jesure ãjõpeorã cũrẽ põtẽrĩrã wa'arãsama. Cũrẽ põtẽrĩrã, marĩ catirã ãpẽrã wẽrĩ'cãrã duporo u'mutãwã'cãsome. ¹⁶ A'tiro pe'e wa'arosa'a. Jesú cũ ucũse dutise me'rã u'musepu a'tigũsami. Õ'acũrẽ wereco'terã

wiogũ Ɂpũtũ ucũquejo, Õ'acũ yaro putiro coronetare putigusami. Tojo wa'acã, Jesure ẽjõpeorã wẽrĩ'cãrã ape upũ me'rã masãmũ'tãrãsama. 17 Na be'roacã marĩ Jesure ẽjõpeorã quẽ'rã a'ti nucũcãpũ catirã o'mecururipũ na me'rã mũjãarãsa'a. Topũ Jesure põtẽrĩrãsa'a. Tojo wee cũ me'rã ninu'cũcã'rãsa'a.

18 Mũsã a'tere ãpẽrãrẽ wereturiaya. Tojo weerã mũsã a'merĩ wãcũtutuacã weerãsa'a.

5

1 Di nũmũ, no'ocãtero nicã Jesũ apaturi a'tigusari nisema masĩno'ña marĩ'i. Tojo weerã mũsãrẽ werewe'e. 2 Queose me'rã mũsãrẽ weregũti. Ni'cũ yajari masũ ñamipũ wãcũña marĩrõ yajagũ a'tisami. Cũ weronojõta Jesũ quẽ'rã marĩ ne wãcũtiri cura a'tigusami. Mũsã cũ wãcũña marĩrõ a'tiatjere masĩtojasa'a. 3 Jesure ẽjõpeotirã cũ apaturi a'tiatji duporoacã a'tiro wãcũrãsama. "Õsã uiro marĩrõ añurõ nicã'a", nirãsama. A'tiro na wãcũcũñarĩ cura narẽ peje ña'ase wa'arosa'a. Ni'cõ nijĩpaco wãcũña marĩrõ wĩ'magũ wuatji duporoacã pũrĩse pi'etinũ'cãsamo. Na quẽ'rã Jesure ẽjõpeotirã tojota wãcũña marĩrõ Ɂpũtũ pi'etirãsama. Ne ni'cũ yũ'rũwetisome. 4 Masã Jesure ẽjõpeotirã na'itĩ'arõpũ nirã weronojõ nisama. Na cũrẽ yũ'rũnũ'cã, cũ Ɂaro weetisama. Mũsã pũrĩcã na weronojõ niwe'e. Tojo weerã Jesũ cũ apaturi a'ti di'tapũ a'ticã, ã'auçũasome. Yajari masũrẽ ã'amarĩarõ weronojõ wa'asome. 5 Mũsã ña'ase weeseti'quere Jesũ acobojotojacũ niwĩ. Tojo

weerã bo'reyuro, ʌmʌcopʌ nirã weronojõ ni'i. Marĩ Jesú yarã ña'ase weeborãnojõ niwe'e. Jesure ẽjõpeotirã pe'e ña'arõ weesetisama. Na'itĩ'arõ, ñamipʌ nirã weronojõ nisama. ⁶ Marĩ cãrĩrã weronojõ niticã'rã. Jesú apaturi a'tiatjere wãcũtirã, cãrĩrã weronojõ nisama. Marĩ pe'e cũ a'tiatjere añurõ tʌ'omasĩse me'rã wãcũnʌrũrã. Ña'ase weesĩ'rĩrã, wãcũtutuarã. ⁷ Ñamipʌ masã cãrĩma. Que'ari masã ñamipʌta que'asama. ⁸ Marĩ pe'e Jesú yarã ʌmʌcopʌ nirã weronojõ ni'i. Tojo weerã marĩ weesere añurõ tʌ'oña'nʌ'cõtojarãpʌ weesetirã. Queose me'rã weregʌti. Ni'cũ surara a'mewẽjẽrõpʌ wa'agʌ, cũ upʌre cã'mota'agʌ cõmesu'tiroke sãñasami. Cũ weronojõta marĩ wãtĩrẽ cã'mota'arã Õ'acũrẽ ẽjõpeonu'cũcã'rã. Āpẽrãrẽ ma'irã. Dupoare cã'mota'arã cõmesapeare pesaro weronojõ Jesú cũ apaturi a'tiatjere, marĩ cũ me'rã ninu'cũatjere wãcũnʌrũrã. Marĩ tojo weecã, wãtĩ marĩrẽ ña'arõ weemasĩtisami.

⁹ Õ'acũ bu'iri bocato nígũ mejẽta marĩrẽ besecu niwĩ. Mejõ marĩ bu'iri cʌobo'cãrãrẽ marĩ wiogʌ Jesucristo me'rã yʌ'rʌocʌ niwĩ. ¹⁰ Cũ me'rã ninu'cũcã'to nígũ marĩrẽ wẽrĩbosacu niwĩ. Tojo weerã cũ apaturi a'ticã, cũrẽ ẽjõpeorã wẽrĩ'cãrã, marĩ catirã cũ me'rã ninu'cũcã'rãsa'a. ¹¹ Tere wãcũrã, mʌsã ni'cãrõacã weesetironojõta ãpẽrãrẽ a'merĩ weetamu, wãcũtutuacã weeya.

Pablo Tesalónicacjãrãrẽ cũ werecasa'que ni'i

12 Acawererã, musãrẽ a'tiro weecã uasa'a. Õ'acũ ye queti wererãrẽ, cũ bese'cãrãrẽ wiope-sase me'rã ì'aña. Õ'acũ narẽ cũ ye quetire bu'edutigu, musãrẽ werecasadutigu cũucu niwĩ.

13 Na musã de'ro wee nisetiatjere wererã, uputu da'rama. Tojo weerã ma'ise me'rã narẽ wãcũña. A'merĩ a'pepũrĩticã'ña. A'merĩ añurõ nisetiya.

14 Apeye musãrẽ werenemorãti. Nijĩsijarãrẽ da'radutiya. Wãcũque'tirãrẽ wãcũtutuacã weeya. Õ'acũ yere weetutuaturãrẽ weeta-muña. Musãrẽ mejẽcã wa'acã, uayeticã'ña. Nu'cãña.

15 Musãrẽ ãpẽrã ña'arõ weecã, narẽ a'meticã'ña. A'tiro pe'e weeya. Musã me'rãcjãrãrẽ, nipe'tirãrẽ añurõ weenu'cũcã'ña.

16 E'catise me'rã ninu'cũcã'ña. Bujawetiticã'ña. 17 Musã no'o nirõ, no'o wa'aro Õ'acũrẽ wãcũ ñubueni'cũcã'ña.

18 Musãrẽ ña'arõ, añurõ wa'acã quẽ'rãrẽ, Õ'acũrẽ e'catise o'onu'cũcã'ña. A'te nipe'tisere Õ'acũ marĩ Jesucristore ejõpeorãrẽ weecã uasami.

19 Espĩritu Santu musã wãcũsepũre werecã, cã'mota'aticã'ña. Yu'tiya cũ dutisere. 20 Õ'acũ ye queti weresere tu'orã, yabi bujicã'ticã'ña.

21 A'tiro pe'e weeya. Na weresere wãcũ, tu'ocasanu'cõpe'ocã'ña. Añuse nicã, tere weeya.

22 No'o ña'ase nisenojõrẽ weeticã'ña.

23 Õ'acũ ejerisãjãserẽ o'ogu musãrẽ a'tiro weeato. Siape me'rã añurõ, ña'ase marĩrõ, cũ uaro dia'cũ weecã weeato. Musã ejeripõ'rãrĩrẽ, musã wãcũsere, nipe'tiro musã upũre co'teato. Cũ a'tiro weecã, marĩ wiogu Jesucristo apaturĩ a'tigu, musãrẽ bu'iri marĩrã bocaejagusami.

24 Õ'acũ musãrẽ bese'cu nipe'tise cũ “Weeguti” ní'quere queoro weegusami. Tojo weegu ãsã musãrẽ sêrĩbosasere yu'tigusami. ²⁵ Acawererã, ãsã quẽ'rãrẽ Õ'acũrẽ sêrĩbosaya.

²⁶ Nipe'tirã tocjãrã Jesure ãjõpeorãrẽ ma'ise me'rã añudutiya.

²⁷ Marĩ wiogu Jesú cũ dutiro me'rã a'ti pũrĩrẽ nipe'tirã Jesure ãjõpeorãrẽ bu'eĩ'oduti'i.

²⁸ Jesucristo marĩ wiogu musãrẽ añurõ weeato. Tocã'rõta oja'a.

Pablo

**Õ'âkã hi yeere uúkũri turi Tukano
New Testament in Tucano (BR:tuo:Tucano)**

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-12-01

PDF generated using Haiola and XeLaTeX on 22 Feb 2024 from source
files dated 31 Aug 2023

00ebd04f-7b0d-5a72-9407-eb53ae2bd086